

**Вторник четвертая седмицы.
На шестом часе.**

Тропáрь прорóчества, глас 6:

**Кресту́ Твоему́ поклоня́емся, Влады́ко, и свято́е воскресе́ние Твое́ сла́вим.
Слава, и ныне: тойже.**

Прокíмен, глас 6:

Благословéн Бог, Ёже не отста́ви моли́тву мою́, / и ми́лость Свою́ от мене́.

Стих: Благослови́те язы́цы Бо́га на́шего.

Пс 65:20, 8А

Прорóчества Иса́иина чтéние.

Гóсподи Бо́же мой, просла́влю Тя, воспою́ и́мя Твое́, я́ко сотвори́л еси́ чу́дная дела́, сове́т дрéвний и́стинный, да бу́дет, Гóсподи. Я́ко положи́л еси́ гра́ды в персть, гра́ды твёрдые, е́же па́сти основа́ниям их, нечестíвых град да не сози́ждется в век. Сего́ ра́ди благословя́т Тя лю́дие ни́щии, и гра́ди челове́ков обидимых возблагословя́т Тя. Был бо еси́ вся́кому граду́ смире́нному помо́щник и изнемога́ющим за оскуде́ние покрóв, от челове́к злых изба́виши их, покрóв жа́ждущих, и дух челове́ков обидимых. А́ки челове́цы малоду́шнии жа́ждущии в Сиóне, я́ко изба́виши их от челове́к нечестíвых, и́мже нас пре́дал еси́. И сотвори́т Госпо́дь Савао́ф всем язы́ком: на горе́ сей испио́ут ра́дость, испио́ут вино́. Пома́жутся ми́ром на горе́ сей, преда́ждь сия́ вся язы́ком, той бо сове́т на вся язы́ки. Пожре́ смерть возмо́гши, и па́ки отъя́т Госпо́дь Бог вся́кую слéзу от вся́каго лица́; поноше́ние люде́й отъя́т от всея́ земли, уста́ бо Госпо́дня глаго́лаша сия́. И реку́т в день о́ный: се Бог наш, На́ньже упова́хом, и спасе́т нас. Сей Госпо́дь, потерпе́хом Его́, и возра́довахомся, и возвесели́хомся о спасе́нии на́шем.

Ис 25:1-9

Прокíмен, глас 6:

Благослови́ ны, Бо́же, Бо́же наш, / благослови́ ны, Бо́же. Стих: Бо́же, уще́дри ны и благослови́ ны.

Пс 66:7Б-8А, 2А

**Вторник четвертая седмицы.
На вечерни.**

Прокíмен, глас 6:

Воспо́йте Гóсподеви, / по́йте и́мени Его́. Стих: Путесотвори́те возше́дшему на за́пады.

Пс 67:5А

1. Бытия́ чтéние.

Рече́ Бог Но́еви, и сыно́м его́ с ним, глаго́ля: се Аз поставля́ю заве́т Мой вам, и се́мени ва́шему по вас, и вся́кой ду́ши живу́щей с ва́ми, от птиц, и от скот, и всем звере́м земны́м, ели́ка с ва́ми суть от всех изше́дших из ковче́га.

И поставлю завет Мой с вами, и не умрет всяка плоть ктому от воды потопная, и ктому не будет потоп водный, еже истлити всю землю. И рече Господь Бог Ноэви: сие знамение завета, еже Аз даю между Мною и вами, и между всякою душею живою, яже есть с вами в роды вечныя. Дугу мою полагаю во облаце, и будет в знамение завета вечнаго между Мною и землею. И будет егда наведу облаки на землю, явится дуга Моя во облаце, и помяну завет Мой, иже есть между Мною и вами, и между всякою душею живущею во всякой плоти, и не будет ктому вода в потоп, яко потребити всяку плоть. И будет дуга Моя во облаце, и узрю ю, еже помянути завет вечный между Мною и землею, и между всякою душею живущею во всякой плоти, яже есть на земли. И рече Бог Ноэви: сие знамение завета, егже положих между Мною, и между всякою плотию, яже есть на земли.

Быт 9:8-17

Прокімен, глас 6:

Спасение Твое, Боже, / да примет мя. Стих: Да узрят нищии, и возвеселятся.

Пс 68:30Б, 33А

2. Притчей чтение.

Уста разумнаго хвалима бывають от мужа, слабосерд же поругаемь бываает. Лучше муж в безчестии работаяй себе, нежели честь себе обложив, и лишаяйся хлеба. Праведник милует души скотов своих, утробы же нечестивых немилостивны. Делаяй свою землю, исполнится хлебов, гонящии же суетная лишени разума. Иже есть сладостен в винном пребывании, в своих твердынях оставит безчестие. Желания нечестивых зла, корение же благочестивых в твердостех. За грех устен впадает в сети грешник, избегает же от них праведник. Смотриаяй кратко, помилован будет, а сретаяй во вратех, оскорбит души. От плодов уст душа мужа наполнится благих, воздаяние же устен его воздастся ему. Пути безумных прави пред ними, послушает советов мудрый. Безумный абие исповесть грех свой, крьет же свое безчестие хитрый. Явленную веру возвещает праведный, свидетель же неправедных лстив. Суть, иже глаголюще уязвляють аки мечи, языцы же премудрых исцеляют. Устне истинны исправляють свидетельство, свидетель же скор язык имать неправеден. Лесть в сердце кующаго злая, хотящии же мира, возвеселятся. Ничтоже неправедное угодно есть праведному, нечестивии же исполняются злых. Мерзость Господеви устне лживы, творяй же верно приятен Ему.

Притч 12:8-22